

## TANEE PEDRO NAAJIONEE

*Pedro saruhuatasacari narta Pueyaso pueya*

<sup>1</sup> Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiquiaari pocuaji Tacuna Jesucristoocua, taa nocua canaa tiuuquiaaricuaani. Nocua nia tiuuniuni, cunoori jiyanohua panishano. Naacujitij, Pueyasoori nia jiyanoquiaa juhua sesa miyashijiaca nia quiniuria na niquiara, taa canaa quiyacuaani. <sup>2</sup> Seetanujuanaa maatia nia niishitiriquia Pueyasoni, pa Jiyaniijia Jesunio. Naacujitij, niaari socua jiyanohua cumaquishaanutaniya. Nioojiaari cajitishaanutaniyajuhuj, juhuajaniya quijiaca nia quiniuria.

*Pueyaso pueya cuara nio niishitiojosano miijiaca quiiria*

<sup>3</sup> Jesucristojuanaacuajaari pa sequequiaari na pueya pa quiniuria. Paari na masuunu tojiqiaarini, pa niishishacari nojuajaari seetanujuanaa Pueyaso Niyanu, tojetaarucujanaa maninia miijia. Seetanujuanaa maatia pa niishiniuucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojiaca pa quiniuriajuhuaj. <sup>4</sup> Naa jiyanohua maninia miijia Jesucristo quiniuucuatej, nojuajaari pa niishitiquiaari casaa na miintu paniya pajaniyarani. Pajaniyarano na sequesanoori seetanujuanaa maninia, tojishocoriquiano. Paa jaara na sequesano tojitiajaca quiri seetanujuanaani, paari jatanishaanutaniyani juhua nojuaja pa quiniuriajuhuaj. Naacujitij, paari quiariniora jatanishaaquiaari na cumaacatani maja pa sesenura. Paa jaara Pueyaso tojiyashijiaca quiriqiuani, paa maara tojetaarucujanaa seseriquiani, taa mijiria quiniaa pueya sesequiaacuaani tama nojori panishano miijiacajaaja nojori quiniuucua.

<sup>5</sup> Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuujiaa. Naa nocua tiuujiaa nia quiniuucuatej, jiyanoehua nia saniniujiuri maninia miijiaca nia quiniuria pueyaracaanu. Naa maninia miijiaca nia quishacaritij, jiyanoehua nia saniniujiuri socua niishijiaca nia quiniuria, sesa miiniu nia ruuretanura. <sup>6</sup>Naa niishijiaca nia quishacaritij, jiyanoehua nia saniniujiuriquia tama nia cuaqueya miiniu panishanojaaaja rejetejaca nia quiniuria, maja nia miiniuria sacuaratía casaa nia panishano. Naa tama nia cuaqueyajaaja rejetejaca nia quishacaritij, jiyanoehua nia saniniujiuriquia juhujaniya sashijiaca nia quiniuriajuhuaj. Naa juhujaniya sashijiaca nia quishacaritij, jiyanoehua nia saniniujiuriquia seetanujuanaa Pueyaso panijiaca nia quiniuria. <sup>7</sup> Naa Pueyaso panijiaca nia quishacaritij, jiyanoehua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij, jiyanoehua nia saniniujiuriquia tojetaarucujanaa panijiaca nia quiniuria.

<sup>8</sup> Naa jaara puetunu nio niishitiojosanojuanaa tojijiaca quiriqia seetanujuanaa, majaari najuhuana pa Jiyaniijia Jesucristo niishijiaca nia quiniu quiniutianiya. Naajuhuj, majaari najuhuana quijiaca nia quiniu quiniutianiya. <sup>9</sup> Nio rootasano tojiyashijiaca saniniuujia, nojoriiri juhua cariy-ojuaru, niishiyashijiaca. Naa nojori quiniuucuatej, nojori-iri niyajetaquiaa nojoricuajaari juhua jeequejosaaquiaari sesa nojori miishanojiniji. <sup>10</sup> Cuarta Pueyaso pueyanaa, Pueyasocuajaari nia sequequiaari na pueya nia quiniuria. Nojuajaari nia saquiriojoquiaari. Cunora, puetunu nio cua rootasanojuanaa tojijiaca nia quiriqia seetanujuanaa. Naacuajitij, niocua niishiri niari seetanujuanaa Pueyaso pueya. Majaari quenaaja nocuaji nia rupertenu quiniutianiya. <sup>11</sup> Naa maninia quijiaca nia quiniuucuatej,

niaari shuquiriaatia tiuquinitiasaanutaniya jiyocuaaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijiajanaa na quiniuucua.

<sup>12</sup> Niaacuaajaari maatia niishitiojosaaquiaari Pueyaso rupaa Jesucristojiniji. Niaari cuno seetanujuanaa rupaacua tiuujia. Naajaa, janiyari pueyaracaanu nia niishitiniutianiyani, maninia nia racatanura nia numaama.

<sup>13</sup> Mijiria cua rishishacarijia, Jesucristo jiyaramiquishano cua quiniuucua, maniniacuaajaari pueyaracaanu cua shiniujiuniuria niajaniya, maja tariucua nia niishishano Jesucristo rupaa jiniji nia niyajetanura. <sup>14</sup> Pa Jiyaniijia Jesucristoori tari cua niishitiriucuaa janiyari quera mosaanutaniyani. <sup>15</sup> Cunora, janiyari nio naajiya niaarani. Naacua-jitij, janiya jaara mosaareni, niaari nio cua naajionee jitianutaniya cua nuhuaji nia serojosocoriquiano. Maniniacuaajaari nia jitianura cua naajionee maja nia niyajetanura puetunujuanaa cua niishitiojosano niajaniya.

*Shacantuuca Jesucristo cumaaca niqiniaajiniji pahuatasano*

<sup>16</sup> Canaa niishitiojosano niajaniya pa Jiyaniijiajiniji, cunoori maja canaa tojishano tamonujiniji. Naajuhuj, cunoori maja tama niishijiacajaaja pahuatasano na sapojonura pueya. Jesucristo cumaacajiniji canaa pahuatanoni, naajuhuj, taa na tiuquiniutianiuhuani, puetunu cunojuanaari maja tama canaa niishishanojuaaja. Canaajanaacuaajaari canaa namijiatajanaa na niqiquiaarini nojuaja jaara shacantuucara jataquiaari canaa niquiara. <sup>17</sup> Jiyacaritij, na Que Pueyasoori jiyano-hua na timitariquiaa canaa niquiara. Canaari na tojiquiaarini naa na sequesacari Neyanujinijitij: “Nojuajaari Quiyanuniojua. Jiyano-hua cua timitiasano”. <sup>18</sup> Canaa quishacari pa Jiyaniijiaata shacantuucara na jatasacui tuhuananuucua, canaajanaari naa Pueyaso tojiquiaari jiyocuaaanuji pocuaanoni.

<sup>19</sup> Canaa tojiniuucua Pueyaso sequesanojuanaa Neyanujiniji, canaari cunora seetanjuanaa niishiyani, tariucuacaanu nojuajiniji pueyara Pueyaso sequesano caminiujiunaa sequesanoori seetanjuanaajuhua. Naaratej, maniacuajaari nia tojiniuria nojori naajiotasano Pueyaso Jiyarosocoriquiano Pueyanojiniji. Nojori naajiotasano, cunoori poojiajinia cuhuataquiaa, naatej, taa samaritiu cuhuataa ninishiquicuaani, cuara juhuaquemajaatijia. Pananuuri saniniuujia muetanutaniyacujua, seetanjuanaa na cuhatanura pajaniya. Naa quiniutianiyajaarihua pa Jiyaniijia muetasacarihua pocua. <sup>20</sup> Maninia nia niishirio, pueyanaa. Puetunu tariucuacaanu Pueyaso sequesano caminiujiunaa naajiotasanojuanaari maja na naata niishishaanu maatia tama pa niishitajataaja. <sup>21</sup> Tariucuacaanu Pueyaso sequesano caminiujiunaa naajionuutasano, cunoori maja tama nojori niishishanojuaaja. Pueyaso Sohuanujuanaacujaari nojori niishitiquaari nojori pohuatanura Pueyaso sequenu panishano pueyara.

## 2

### *Sacuaraatia miijiaca niishitiojonaajiniji pohuatasano*

<sup>1</sup> Tariucuacaanu, noojiaqueya Israel pueyajinijinoori tama na cuaqueyajaaja jiyatequiaari juhua Pueyaso sequenu panishano caminiujiunaa nojori quiniuria. Naacuajitij, nojoriiri narta Israel pueya sapojonuuquiaari. Naajuhua cua panishano pueyanaa, sapojonuujuacaari nia tajinia supenuutaniyajuhua. Nojori niishitiojosacari sacuaraatia tama nojori niishishanojuaaja, nojoriiri nia sapojonutaniya. Nojori niishitiojosanoori Pueyaso pueya sesojua cutara. Naacuajitij, nojoriiri tama nojori Camarnujuaaja tamacanutaniya, cante nojoriicuara mosaaquiaaricujani, na pueya nojori quiniuria juucua.

Cunora, nojoriiri canashiyaquiji niiquiji puetunu shaajasaanutaniyajanaa saniitiosocoriquiano. <sup>2</sup> Queraatia pueyari sacuaraatia miijiaca quiniutianiyajuhuj, sacuaraatia cuno pojori niishitiojosano tojijiaca nojori quiniuucua. Naa nojori miiniuucuatej, Pueyaso niishiyashijiacaari seetanu rupaajanaa sesacanutaniya. <sup>3</sup> Cuno sacuaraatia niishitiojonuujuacaari jiyanhua casamiriaca quiniuucua jiaatiajaca quiniutianiya. Naaratej, nojoriiri najuhua shanhua nojori niishitiojosanota nia sapojonutaniya, nareja nia niqutiojonura nojori nia cumaneeca, nia casaminio. Naajaa, naa sacuaraatia miijiaca nojori quiniuucuatej, nojoriiri tariucuacaanujiniji Pueyaso riuriosanocua na saniitiosocoriquiano. Majaari Pueyaso jiyanoonu quiniutianiya nojori.

<sup>4</sup> Naajuhuj, Pueyaso seya jaara sesa miiquiaari, majaari Pueyaso jiyanoonu quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuara quirijiatijia. <sup>5</sup> Naajuhuj, Pueyasoori Noé quishacari sesa miijiaca pueya jiyanoyaquiquiaarijuhuaj. Cuno sesa miijiaca pajaashitianiquiaariiri nojori cusonunura puetunujuanaa. Saaja Noé curoquiaariiri Pueyaso tojijia na quiniuucua, socua siete pueyano. Noeri pueyaracaanu cuno sesa miijiaca pueya numotequiaari juucua, nojori tacatonura noojia Pueyasoocua, sesa nojori miiniujiniji. <sup>6</sup> Naajuhuj, Sodoma tiacajinia quiniaa pueya quiniuucua jiyanhua sesa miijiaca, Pueyasoori cuno tiaca catijiatiquiaari tojetaarucujanaa juacara. Naa catijiatiquiaari Gomorra tiacajaariuhuj. Cuno caapiqui tiaca naa catijiatasaaquiaarini, cunoori quiquiaari cuno nuhuaji quiriquiano pueya na numootenura maja naa sesa miijiaca nojori quiniurijuhuj, nojori mariqui saniitiosaarejaariuhuj. <sup>7</sup> Sodoma tiaca Pueyaso catijiatasacari, saaja Lot curoquiaariiri maninia pueyano na

quiniuucua. Sodoma tiacajinia quijia Lot quiniuucua, nojuajaari jiyanohua taajequiaari tari, cuno pueya miijionuucua sacuaraatia casaa, tariucua nojori jiidishano casaacua.

<sup>8</sup> Puetunu juucajanaa, Lotri narta Sodoma tiacajinia quiniiaa niqiquiaari cararaatia miitioojiano. Sacuaraatia nojori pocoojonu tojiquiaarijiaariuhuj. Maninia pueyano Lot quiniuucua, nojuajaari jiyanohua naquiya miiquiaari noojiajinia. Cunora, quera Pueyaso sanitiosacari cuno pojori, Pueyasoori Lot mashiquiaari cuno pueya tajiniji. <sup>9</sup> Naacuajiti pueyanaa, paari niishiyani, Pueyasoori na tojitiajaca pueya cojuaja, maja nojori miitishaanura sesa. Saniniuujia, Pueyasoori sesa miijiac racatajajaara nujuatejosano, nojori saniitiojosaanu juucara. <sup>10</sup> Pueyasoori socua jiyanohua nio pojori saniitioriquiano: na camishoo maajipohua numuetucunuucua jiaatiajacani, maajishuriu numuetucunuujua-cajuhuaj, noo pojorijiuhuaj, pa Jiyaniijia rootasano ru-uretajaca saajatej. Naa sacuaraatia miijiacani, nojoriiri tojetaarucuajanaa tojiyashijiaca. Majaari na pueretunu quiquiaa sacuaraatia tama nojori panishanojuaja nojori miiniuria. Naajuhuj, nojoriiri maja na pueretunu quiquiaa jiyocuacaanu cumaacaraca quijiaca na sesacanura. <sup>11</sup> Saniniuujia, Pueyaso seya cutaraari jiyanohua socua cumaacaraca cuno sesa miijiac pueyajiniji. Naajaa, majaari nojori riutioconu quiquiaa Pueyaso, cuno jiyocuacaanu cumaacaraca quijiaca nojori sesacanura.

<sup>12</sup> Cuno pojori, saaja sacuaraatia miiniuria niishitiojonaani, nojoriiri niishiyashijiaca. Nojoriiri juhua nacujinaaco quijiaca casami, teyanote saaja puecoosocoriquiano roosaaquiaacuajani. Tojetaarucuajanaa niishiyashijiaca nojori quiniuucua, nojoriiri maninia quijiaca pa quiniuria pa Jiyaniijia rootasano sesacaquiaa. Cunora, nojoriiri juhua puecoosocoriquiano nacujiniaacoji casaa. <sup>13</sup> Naacuajitij, nojoriiri naquiya miishocoriquianojuhuaj,

naquiya nojori miitianuucua narta pueya. Nojoriiri jiyanoehua timiquiaa nojori jaara naata quiriquia sesa miiniu juucajuhuaj taa nojori miiquiaa niucuacuaani. Cuno pojoriiri sacuaraatia mijiaca. Majaari na niishiniu caririquiniu. Nojori sapojonuucua nijaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajiniatej, nojoriiri jiyanoehua timiquiaa tariucua nojori jiiishano sesa casaacua nojori niishirio-josacari. <sup>14</sup> Naacuajitij, nojoriiri maja nareja na niquiniu quiquiaa maajipohua. Puetunu maajipohuajanaa niq-uitiuquiaa nocua na jiaatianutaari. Nojoriiri maja na taajenu sesa na miiniuria pueyaracaanu. Canapute jatarinitiaja pa Jiyaniijia tojjiani, cuno pojoriiri nojori shiniuquiquiaa na sapojonuta, sesa nojori miiniurijahuaj. Naajuhuj, cuno pojoriiri tariucua jiiitino puetunu nojori panishanojuanaa nojori jiiitanura, jaara na naata quiriquia. Nojoriiri tariucua Pueyaso jiyatesano na sanitiosocoriquiano. <sup>15</sup> Pueyaso rootasano tojiyashijia nojori quiniuucua, nojoriiri juhua tashuquioono Pueyasoocua neteja nuujiniji. Nojoriiri casamiriaca quiniuucua jiaatiajaca juhua supuetana Beor niyanu Balaam. Jiyacaritij, Moab jiya jiyaniijiaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanoehua queraatia casami na niqutionutaniya, nojuaja jaara nocua quiaare, Israel pueya na shimiojonura nera. <sup>16</sup> Casamiicua jiaatiaja na quiniuucua, Balaamri na seru nijinia cajiquiaari. Quiaareeri. Nucuaco na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuajitij, pocuaashijia seruuri Balaam tarinitiquiaariuhua, juhua moseca sesa na miiniu panishacari juucua.

<sup>17</sup> Cuno pojori, pueya sapojoua na niishitiojosanotani, nojoriiri juhua cuari joojequetano. Naajuhuj, nojoriiri juhua niqutioocua paratu piyarojosano, tamoco quiamaa

saajaari. Nojori niishitiojosanoori naajuhuj. Majaari na tojitiyajaca na naacunu. Pueyasoori jiyanohua ninishiqui quiquio tari jiidiaa nojoriicujaji, pueyaracaanu nojori quiquiorano. <sup>18</sup> Nojori pohuatasanoori najuhua shanohua tojishano. Saaja sapojonuuri. Naacuajitij, nojori shusha Jesuucua tiuujiacaca shiniujuquiaa nojori miiniuhua tama nojori cuaqueya panishanojuaaja. Cuno Jesuucua tiuujiacacujajaari shusha naataja sesa miijiacaca pueyajiniinio jatanishaariquiaa juucua, Pueyaso tojijiacaca nojori quiniuria juucua. <sup>19</sup> Sapojonuujuaaca cuno niishitiojonuujuaaca quiniuucua, nojori pueya niishitiojoquiaa sacuaraatia. Pueya niishitiojoquiaari, nojorini-aari seetanujuanaa juhuajaniya quijiacaca quiniutianiya shuquiriaatia, nojori jaara nojori niishitiojosano tojijiacaca quiriquia. ¿Nojori niishitiojosano pueyatucua taa juhujaniya quijiacaca quiriquiani, tama nojorijiaaja jaara sesa miiniuucua jiidinio quiyajaa? Seetanujuanaari, pueyano jaara maja na naata quiriquia sesa casaa na miijionu tarinitianu, cuno pueyanoori seetanujuanaa juhua tama sesa na miijiosano serujuaaja. Majaari na naata na tarinitianu. <sup>20</sup> Pueyanaa, niaacuajaari niishiya, pueyano jaara pocujaji Tacunaacua tiuujiaara quiri, pa Jiyaniijia Jesucristoori na cumaquijia na tarinitianura sesa miini-uria na jiidishano. Saniniuujia, cuno pueyano jaara sesa miijiaara quiriohua, nojuaja jaara sesa miijionura jiidiriohua socua, neraari socua puereeta quiniutianiya Pueyaso niishiyashijiacaca pueyajiniji. <sup>21</sup> Naacuajiti pueyanaa, pueyano jaara seetanu rupajanaa niishijia quiriquia, nojuajaari cocuaatia miya jaara na samiritiarohua sesa miijia na quiniuhua. Cuno pueyanora maara socua maninia quiquiaari maja na niishiniuria Jesucristo rupaa, teyanote na niqiuara pohuatasaaquiaricujani, jatanishano pueyano na quiniuria. <sup>22</sup> Naa pa Jiyaniijia samiritiajaca pueya quiniuucuatej, sesa miijiacaca nojori quiniuhua,



nojoriiri nio tariucuacaanu Pueyaso Rupaajinia naajio-  
tasano tohuateequiaa. Naa miriqui sequeyari: “Sareeri  
coteenu macayoree. Na miaquerohuari”. Naajuhuj:  
“Cushiiri nanatosaaree juucua. Saaja na cooquiojinia  
neeneecuasuhuariuhuj”.

### 3

#### *Pa Jiyaniijia tiuquiniuhua cuaracashitishacari*

<sup>1</sup> Cua panishano cuarta Pueyaso pueyanaa, nioori ta-  
nee cua naajionee niaacuara. Coteenu cua naajiojinia,  
janiyari nia nacasuquiaarini socua cua shiniujiuniuria ni-  
ajaniya maja nioojia niqijijotejaca nia quiniuria Pueyaso  
rootasanojiniji. Janiyari naa miya quiarijia nio cua naa-  
jiojiniajuhuaj. <sup>2</sup> Maninia nia numaama nia racatariquia  
tariucuacaanu pueyara Pueyaso sequesano caminiujiu-  
niaa pohuatasano, pa Jiyaniijia jiyaramiquishano pueya  
pohuatasanonio. Cunocujaari pocuaji Tacuna rootasano  
pajaniyara.

<sup>3</sup> Nio nia niishiriquia cutara pueyanaa. Quera nio  
jiya puequesacari, pa Jiyaniijia soojeacaari supuen-  
taniya. Nojoriiri tama na cuaqueya miiniu panishano  
miijiacajaaja. Na macatiniuria nijaniya, nojoriiri nia  
nequesotanutaniya: <sup>4</sup> “¿Taa nia Jiyaniijia miiquiaarini?  
Nojuacuajaari nia sequequiaari: ‘Tacatenutaniuhan-  
jia’. Majaari na tiuquiniu. Tariucuacaanu na niquninaa  
pa supuetanaacuajaari tari puequecanu. Nio jiyajinia,  
puetunu casaajanaari quiyajaa, juhua shusha na ship-  
inishaanujiniji. Majaari quenaaja tamonu casaa jatanu  
quiquiaa tamaatiara”. <sup>5</sup> Majaari naate pueyanaa. Cuno  
pojoriiri tariucuacaanu Pueyaso miishanojiniji niishiniu  
paniyashijiaca. Jiyanojia tariucuacaanu, Pueyasoori jiya  
cajiniojia shipiniquiaari saaja na pocuanuta. Na se-  
quesacarijuhuaj, jiyari mohuacajiniji muetaquiaari, mo-  
huaca jiuujiajinia na quiniuria. <sup>6</sup> Na nuhuaji, Pueyasoori

cuno mohuacaja pajaashitiquiaari puetunu mijiria qui-  
jiacajanaa na cusojuanura. <sup>7</sup> Quiarijia saniniuujia, jiya  
cajiniocua, nio jiyanio, Pueyasoori na cumaacata nojori  
jiitiaajaara. Na nuhuaji cutara, puetunujuanaari catenu-  
taniya, Pueyaso saniitiosacari puetunu na ruuretajaca  
pueyajanaa.

<sup>8</sup> Naajuhuj cua panishano cuarta Pueyaso pueyanaa,  
pueyaracaanu nio nia niishiriquia. Pa Jiyaniijiaara,  
niquiriyatu juucaari juhua mil marijia. Naajuhuj, mil  
marijiaari juhua niquiriyatu juuca nera. <sup>9</sup> Majaari nia  
jiyaniniu maja pa Jiyaniijia tacatenu quiniutianiuhua.  
Majaari na tarishiniu najuhuanaj, taa tamasa ca jiyaniy-  
acuajani. Maja. Maja cutaraari na paniniu pueya que-  
joosaanura mani quiquiojinia. Naacuajitij, nojuacuajaari  
pueya sashiyajaara nojori tacatonura nojori jiuujia sesa  
nojori miiniuujiniji, Pueyaso pueya nojori quiniuria.

<sup>10</sup> Naajaa, nojuacuajaari tiuquiniutianiuhua. Pueya  
jiyanishacari Jesucristo maja na tiuquiniu quiniutian-  
iuhua, jiyacaritij, canashiyaquiji tiuquiniutianiuhuari.  
Juhua nohuasejojua tiuquiniutianiuhuari, sesa miijiacaa  
na saniitionura. Na nuhuaji, jiya cajiniocuaari shaajenu-  
taniya. Jiyanoehua cojuatunenutaniyari na shaajesacari.  
Casaajiniji jiya shipinishaaquiaarini, cunoori puetunu  
catenutaniyajanaa. Naacuajitij, jiyari puetunu mijiria  
na jiiiasano casaatajanaa shaajasaanutaniya jiyanoehua  
naseeca manijinia.

<sup>11</sup> Quiarijia pa niishishacari taa pa jiya shaajasaanu-  
taniyani, cunora, seetanujuanaa Pueyaso panijiacaa nia  
quiriquia saa maninia miijiacaja nia quiniuria. <sup>12</sup> Naa  
maninia miijiacaa nia quiriquia, Pueyaso cuaara pa Jiyani-  
ijia mueraterohua pocuajaatijia. Pa Jiyaniijia seque-  
sano tojijiacaa nia quiriquia, na tiuquiniu juuca nia  
secootenura. Jiyacaritij, Pueyasoori jiya cajiniocua  
setanutaniya. Naacuajitij, casaata na shipiniquiaari

puetunu casaajanaani, cunoori manijinia mohuaquenu-taniya. <sup>13</sup> Naajaa, Pueyaso cutaraari seetanujuanaa seque-  
quiaari pajaniya, nojuajaari quiarinio jiya cajiniocua ship-  
ininiutianiya pajaniyara, quiarinio jiyanio. Cunora, paari  
shuquiriaatia na sashiyani. Jiyacaritij, majaari quenaaja  
sesa miiniu niishishaanu quiniutianiya socua. Puetunu  
casaajanaari tojetaarucujanaa maninia quiniutianiya.

<sup>14</sup> Naa nia niishishacari casaa pa sashiya nio pa  
quishacarini, cunora, jiyanohua nia saniniujiuriquia  
saaja maninia miijiaca nia quiniuria. Tojetaarucua-  
janaa jiyanooshano nia quiriquiajuhuaj, juhuajaniya nia  
quiniuria pa Jiyaniijia tacoji, na nequesoreesacari pa-  
janiya. <sup>15</sup> Naacujiti pueyanaa, nio nia niishiriquia: pa  
Jiyaniijaari tarishiyajaara pueyacia na taraajenuucua,  
nocua nojori tiuuniuria, Pueyaso jiyanooniuria nojori.  
Tarishiyajaariuhuj tojetaarucujanaa jeenucuasano pa  
quiniuria nera. Pa panishano parta Pueyaso pueyano  
Pablori naa naajioquiaari niaacuarajuhuj, Pueyaso ni-  
ishitiaja na jitianuucua. <sup>16</sup> Nojuacuajaari puetunu na  
naajioneecajiniyajanaa mariyata nio cua pohuatasano po-  
huataa. Noojiaqueya na pohuatasanoori seetanujuanaa  
jiyajeneta pueyara. Naacujitij, mosanucua, noojia niqui-  
jiotejacanio, nojoriiri Pablo niishitiojosano jataniquiaa  
tamaatiara, nojori niishiyaquishacari cuno rootasano.  
Nojoriiri naa jataniquiaa puetunu Pueyaso Rupaajanaa.  
Naacujitij, nojoriiri tama na cuaqueyajaaja jiyatequiaa  
Pueyaso saniitiosocoriquiano nojori quiniuria.

<sup>17</sup> Cunora cua panishano Pueyaso pueyanaa, niaacua-  
jaari tari niishiya cuno Pueyaso rootasano tojiyashijia-  
jiniji. Nocuaji jiyanohua nia cojuariquia tama nia cuaque-  
yajaaja maja nia sapojosaanura sesa miijiaca nia quini-  
uhua. Saaja Pueyaso rupaacua tiuujia nia quiriquia  
cutara, taa nocua tiuujia nia quiyacuajani, cuno po-  
jori mariqui nioojia niquijiotereeri. <sup>18</sup> Naajuhuj, socua  
pocuaji Tacuna niishiniuucua jiaatiajaca nia quiriquia.

Naa maninia nia niishiri pa Jiyaniijia Jesucristo, socua na panijiaca nia quiniuria, socua na cumaaca nia jiitianu-rajuhuj. ¡Pa Jiyaniijaari jiyanoehua maninia! ¡Nojuaja cuaara shuquiritiasaaria quiariija, pueyaracaanujuhuj! Cuaara naa quiiriatej.

Quiarinio pueyaso rupaa pa jiyaniijia Jesucristojiniji  
pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 14 Jun 2022 from source files dated 30 Nov 2021

90034700-94c6-5f48-ae9c-2383843fed68